



Poštovane kolegice i kolege,
dragi uposlenici Univerziteta u Sarajevu,

Prije svega, nadam se da će Vas ovo pismo zateći u dobrom zdravlju. Iako nam je svakodnevica obilježena teškom i neizvjesnom situacijom, želim da znate da u svakom trenutku imate na raspolaganju službe Rektorata i mene samog. Samo uz zajedničko djelovanje i međusobnu podršku ćemo sačuvati svoje zdravlje, poslove i razum.

Kao što smo svi svjedoci, usljed vanrednih okolnosti, Univerzitet u Sarajevu se našao u potpuno novoj i nezavidnoj situaciji, i primorani smo da se snalazimo na razne načine kako bismo održali svoju djelatnost i nastavili podučavati nesmetano naše studente. Cilj nam je da osiguramo nastavak što većeg broja aktivnosti na UNSA, te da svakako spriječimo zaustavljanje procesa nastave.

Kako bismo izbjegli ozbiljne neželjene efekte koji se na UNSA mogu odraziti i u narednim semestrima, trenutno dajemo prednost sljedećim aktivnostima:

- Nastavne aktivnosti i održavanje svih predavanja/vježbi nesmetano u punom fondu sati
- Provođenje ispita i drugih provjera znanja
- Nastavak aktivnosti oko upisa nove generacije studenta

Kao Rektor najvećeg i najstarijeg i univerziteta u Bosni i Hercegovini, izrazito sam ponosan na kvalitet i brzinu organizacije naših fakulteta tokom ove prinudne digitalne transformacije. Organizacione jedinice su u rekordnom vremenu uspjele organizovati svu nastavu kroz online aktivnosti. Impresivno je koliko su brzo i efikasno kolege počele surađivati između odjela, organizacionih jedinica kako bi na novi način rješavali zadatke i prevazišli izazove. Na nekoliko fakulteta se već godinama koristi Moodle, pa su oni već djelomično imali spremne online platforme i brzo odговорili izazovu. Većina fakulteta se odlučila za ZOOM platformu, koja se jako dobro pokazala i za izvođenje punog fonda sati. Par fakulteta je implementiralo BigBlueButton, kao veoma profesionalno rješenje, dok su se pak neki odlučili na kombinaciju svega navedenog. Ovako brza i profesionalna reakcija je vrijedna svake pohvale.

Ništa od navedenog ne bi bilo moguće bez podrške svih službi na fakultetima i u rektoratu. Ne treba zaboraviti da su IT službe sada postale srce našeg UNSA organizma i da bez njih ne bismo mogli sami riješiti ovako zahtjevne izazove. Službe računovodstva, službe za organizaciju nastave, pravne službe, aktivnosti oko promocije upisa i sve ostale također nisu ni na trenutak zaustavljene. Samo smo prešli na online izvršavanje tekućih obaveza. Posebno se želim zahvaliti rukovodstvima svih organizacionih i podorganizacionih jedinica, bez čije jasne vizije i vodstva u ovom trenutku, naši bi procesi bili potpuno zaustavljeni, a posljedice izrazite i u godinama koje slijede.

Mnogi nastavnici su lično uložili i vlastita sredstva da omoguće kvalitetnije izvođenje nastave, od korištenja vaših kućnih računara, interneta, ili kupovine licenci za navedene platforme.

Stavili ste studentima svoje knjige u online formi na raspolaganje i prilagodili svoje materijale u ovom kratkom roku online nastavi.

Hvala vam svima na solidarnosti, profesionalnosti i predanosti!

Apelujem i molim vas da zajedno prevaziđemo te probleme. Molim organizacione jedinice koje koje imaju znanje, iskustvo i vještine kao i tehničke mogućnosti da se stave na raspolaganje i pomognu drugima. One kojima je pomoć potrebna u ad hoc digitalnoj transformaciji, molim da nas kontaktiraju kako bismo lakše zajedno odgovorili izazovu. Ovaj trenutak trebamo što bolje iskoristiti da zahvaljujući međusobnoj sinergiji iz ove situacije izađemo još jači, kao jedna jedinstvena organizacija, što Univerzitet i jeste.

Na kraju vas molim da čuvate sebe i svoje porodice, i želim vam svako dobro.

S poštovanjem,

REKTOR

Prof. dr. Rifat Škrijelj

